

NORÛ TAXRE GA POPERA GA

TECHARÓNICAWA JEXMAGÜXÛ GA

JAXÕGÜXÛTANÜWA NAMUXÛ GA PAURU

**Pauru rü nüxü narümoxë
ga jema jaxõgüxü ga
Techarónicawa jexmagüxü**

1 Pa Techarónicawa Ngëxmagüxü i Toeneëgü i Jaxõgüxü i Tanatü ja Tupana rü tórü Cori ja Ngechuchu ja Cristuarü Duüxügü Ixígüxüx, chama i Pauru rü namaã i taeneë i Siuwánu rü Timúteu nixí i pexçax tanaxümatüxü i nhaã popera. ²Rü tanaxwaxe i Tanatü ja Tupana rü tórü Cori ja Ngechuchu ja Cristu pexü narüngüxëë rü pexü nataãëxëë.

**Ngëma chixexü ügüxü rü Tupana tá
nanapocue i ngëxguma wenaxärü
núma naxüxgu ja Cristu**

³Pa Toeneëgüx, rü guxüguma pexçax Tupanana moxë taxã, erü name nixí na ngëmaãcü tanaxüxü. Erü guxüguma jexeraãcü pejaxõgüetanü rü jexeraãcü pegü peingechaügüetanü. ⁴Rü ngëmacax tomatama taãëácüma pechigaxü tixu natanüwachigü i ngëma duüxügü i

Tupanaãxü jaxõgüxü. Rü namaã nüxü tixu na nhuxãcü meã pejaxõgüxü, rü nhuxãcü namaã peporaexü i guxüma i ngëma guxchaxügü rü ngúxügü i pexü ngupetüxü. ⁵Rü ngëma guxchaxügü i pexü ngupetüxüwa nüxü tacuax na aixcumacü jüxü ja Tupana, erü pexü nangugü na aixcuma pemexü na peichocuxüçax i ngextã nüma ãëxgacü jüxüwa. Rü ngëma na peichocuxüçax nixí i ngúxü peingegüxü i nhuxmax. ⁶Rü aixcuma name nixí na Tupana napocuexü i ngëma duüxügü i ngúxü pexü ingegüxëëxü. ⁷Notürü i pema i nhuxma ngúxü ingegüxe rü name nixí i wüxigu tomaã pexü inarüngügüxëë ja Tupana. Rü ngëma rü tá nanaxü ja Tupana i ngëxguma üxüemagu dauxüwa ne naxüxgu ja tórü Cori ja Ngechuchu ja Cristu wüxigu namaã i norü oreatü ngerüügü i poraexü. ⁸Rü aixcuma núma tá naxü i nüma ja tórü Cori ja Ngechuchu na napocueãxüçax i ngëma duüxügü i tama Tupanaxü cuãxchaügüxü rü tama naga ñnüëxü i ngëma ore i mexü i tórü

Cori ja Ngechuchu ja Cristuchiga. ⁹Rü ngêma duũxũgü rü wüxi i pocu i taguma gúxũgu tá napocue erü tórü Cori ja Ngechuchuarü jaxũwa tá nawogü. Rü ngêma rü tagutáma nüxũ nadaugü na nhuxácü namexêchixũ rü naporaxũ ja tórü Cori ja Ngechuchu. ¹⁰Rü ngêmaácü tá ngêma duũxũgümaã nangupetü i ngêxguma tórü Cori ja Ngechuchu núma ũxgu. Rü núma tá nangu na nóri duũxũgü nüxũ icuaxũũgũxũcax, rü tá nabaixächiaêgü rü nataãêgü erü tá nüxũ nadaugü na nhuxácü namexêchixũ i nümax. Rü pema rü tá ta wüxigu namaã pengêxmagü, jerü pejaxögü ga jema Tupanaärü ore ga pemaã nüxũ tixuxũ. ¹¹Rü ngêmacax guxũguma pexcax tajumuxêgü. Rü Tupanana taca na nüma pexũ nadauxũ na aixcuma mexũ i norü duũxũgü peixĩgũxũ i nhuxma na pexũ jadexechixũ. Rü ngêxgumarüũ ta nüxna taca na nümatama norü poramaã janguxêêxũcax i guxũma i ngêma mexũ i peãêwa nagu perüxinüêxũ rü guxũma i ngêma puracügü i mexũ i perü ôgagu pexũxũ. ¹²Rü ngêxguma Tupana ngêmaácü pexũ rüngũxêêgü, rü perü maxũ i mexũgagu rü guxũma i duũxũgü tá nüxũ nicuaxũũgü ja tórü Cori ja Ngechuchu ja Cristu. Rü nümatama ja tórü Cori rü tá pemaã nataãê erü nüma rü wüxigu Tanatü ja Tupanamaã pexũ nangechaũgü.

Pauru rü nanangoxêê i nhuxácü tá na jiixũ i ngêxguma ínanguxgu ja Cori ja Ngechuchu

2 ¹⁻²Rü nhuxma Pa Chaueneêgüx, rü pemaã nüxũ chixuxchaũ i nachiga na nhuxácü tá na jiixũ i ngêxguma tórü

Cori ja Ngechuchu ja Cristu wena núma ũxgu rü tũxũ nangutaquexêêgügu na wüxiwa namaã ingêxmagüxũcax. Rü pexũ tacaxũgü na tama ngüriüachi togumare perüxinüêxũ rü paxa pejaxögüxũ i tacü rü ore i tama toma pemaã nüxũ tixuxũ. Erü tama tanaxwaxe na pebaixächiaêgüxũ ega texé pemaã idoraegu rü pemaã nüxũ ixuxgu na marü ínanguxũ ja tórü Cori ja Ngechuchu. Rü ngêxguma texé pemaã nüxũ ixuxgu na nagu taxãnegüxũ na Cristu rü marü ínanguxũ, rü tama name i tûmaga pexĩnüê. Rü woo pemaã nüxũ tixugügügu na tanajauxgüxũ i wüxi i torü popera i nüxũ ixuxũ na marü ínanguxũ ja tórü Cori ja Ngechuchu, ¡rü tãũxütáma tũxũ pejaxögü! ³¡Rü tãũxütáma naga pexĩnüê i ngêma duũxũgü i ngêmaácü pexũ womüxêêgüchaũxũ! Erü naxũpa na Ngechuchu núma ũxũ rü tá ínangu i ngêma jatü i Tupanaärü uwanü ixixũ, rü tá nananuêxêê i muxũma i duũxũgü i jaxögüchiréxũ. Nottürü ngêma jatü rü Tupana marü namaã nanaxuegu rü tá napocu. ⁴Rü ngêma Tupanaärü uwanü rü tá Tupanamaã rü guxũma i ngêma Tupanaärü ixixũmaã narüxuanü. Rü tá nachi naxai i guxũma i tacü i mexũ i duũxũgü Tupanaxũ namaã icuaxũũgüxũ. Rü Tupanaärü tupauca ja taxũnewa tá najarüto nhama Tupana jiixũrüũ. Rü tá nügü nixu na Tupana jiixũ. ⁵¿Tama exna nüxna pecuaxächie rü jexguma petanüwa chajexmagu rü marü meãma pemaã nüxũ chixu nachiga ga jema? ⁶Rü pema marü nüxũ pecuax na tũxcüũ jiixũ i taüta núma naxũxũ i ngêma Tupanaärü uwanü. Taüta núma naxũ, erü taüta nawa nangu i ngunexũ na ínanguxũ. ⁷Rü

ngēma chixexũ i Tupanaãrũ uwanũ üxũ, rü marũ cúácũ inaxügũ. Notürü nümatama i Tupanaãrũ uwanũ rü tãüxütãma nangox nhuxmatãta ngēma norũ chogürũ nüxũ ingé. ⁸Rü ngëxguma tá nixĩ i ínanguxũ i ngēma Tupanaãrũ uwanũ. Notürü nüma ja tórũ Cori ja Ngechuchu rü wüxi i naãxwa “cue” nhaxũmaã tá najamaç. Rü ngëxguma ínanguxgu ja tórũ Cori ja Ngechuchu rü ngēma norũ jauxraciũxũmaã tá inajanaxoxëe i ngēma norũ uwanũ. ⁹Rü ngēma Tupanaãrũ uwanũ, rü ngëxguma ínanguxgu rü tá nüxũ nangëxma i Chatanaãrũ pora rü ngëmacaç tá naporaxũchi. Rü tá nanaxũ i nagúxũraũxũ i cauxruügũ i Chatanaãrũ poramaã naxũxũ. ¹⁰Rü nagúxũraũxũ i chixexũ tá naxũ na nawomüxëëãxũcax i ngēma duũxügũ i Tupana tá pocuexũ. Rü ngēmaãcü tá nüxũ naxüpetũ i ngēma duũxügũ, erũ tama nanajauxgüchaũ rü tama nüxũ nangechaũ i ngēma Tupanaãrũ ore i aixcuma ixĩxũ i tüxũ maxëxëxũ. ¹¹Rü ngëmacaç ja Tupana rü nanangexrũ i ngēma duũxügũ na poraãcü ínatüexũcax rü jaxögüãxũcax i ngēma ore i doramare ixĩxũ. ¹²Rü ngëmacaç düxwa Tupana tá namaã nanaxuegu na napocuexũ i guxũma i nümagũ i tama jaxögüchaũxũ i ore i aixcuma ixĩxũ rü namaã taãëgüxũ i ngēma chixexũ na naxügüxũ.

**Tupana tüxũ nidexechi
na tüxũ nangëxmaxũcax i
maxũ i taguma gúxũ**

¹³Notürü, Pa Chaueneëgüx i Tórũ Cori ja Ngechuchu Pexũ Ngechaũgüxex, rü guxũguma Tupanana moxë pexçax taxã

jerü nüma ga Tupana rü noxritama naãne ixügügumama pexũ nidexechi na pexira penajauxgüxũcax i maxũ i taguma gúxũ ga jexguma pexũ nangüxëëgu ga Naãë i pexũ üünexëëxũ rü pejaxögügu ga jema ore i aixcuma ixĩxũ. ¹⁴Rü jemacaç Tupana pexçax naca ga jexguma pemaã nüxũ tixuxgu ga norũ ore i mexũ i tüxũ maxëxëxũ. Erũ nüma nanaxwaxe na pexũ nangëxmaxũcax i pechica i tórũ Cori ja Ngechuchu ja Cristuxütawa i ngextã ínamexëchixüwa. ¹⁵Rü ngëmacaç, Pa Chaueneëgüx, rü chanaxwaxe i meã pejaxögüama rü tama nüxũ ipejarüngümaë ga jema ore ga tomatama pexũ tangüxëëxũ rü jema ore ga poperagu pexçax taxümatüxũ. ¹⁶⁻¹⁷Rü chanaxwaxe i tórũ Cori ja Ngechuchu ja Cristu rü Tanatü ja Tupana pexũ nataãëxëëgü rü pexũ narüngüxëë na guxũguma mexũ i oremaã peidexagüxũcax rü mexũ pexügüxũcax. Rü jima Tanatü ja Tupana nixĩ ja tamaã namecümaãcüma tüxũ ngechaũcü rü guxũguma tüxũ taãëxëëcü rü tamaã ixunetacü na wüxi i ngunexũ tá naxütawa ingëxmagüxũ.

**Pauru naxçax ínaca na
naxçax najumuxëgüxũ**

3 ¹Rü nhuxma Pa Chaueneëgüx, rü chanaxwaxe na toxçax pejumuxëgüxũ na paxa guxũwama nangüxũcax i tórũ Cori ja Ngechuchuarũ ore i mexũ, rü duũxügũ norũ ngüchaũmaã na najauxgüxũcax ga jema pema na penajauxgüxũrũ. ²₁Rü toxçax pejumuxëgü ta na tama tacü rü chixexũ tomaã naxügüxũcax i ngēma duũxügũ i

chixexŭgü! Erü tama guxŭma i duŭxŭgü najaxögü. ³Notürü tórü Cori ja Ngechuchu rü aixcuma najanguxêê i ngêma tamaã inaxunetaxŭ. Rü nüma tá pexŭ naporaexêê rü pexna nadau na tama chixexŭgu pejixŭçax. ⁴Rü tórü Cori ja Ngechuchu toxŭ nüxŭ nacuxxêê na aixcuma penaxŭxŭ i ngêma pexŭ tamuxŭ rü tagutáma nüxŭ perüxoexŭ na ngêmaãcŭ penaxŭxŭ. ⁵Rü tanaxwaxe i tórü Cori ja Ngechuchu pexŭ narüngŭxêê na aixcuma pegü pengechaŭgŭxŭçax, ngêma Tupana tüxŭ ngechaŭxŭrüü. Rü naxçax ítaca na pexŭ naporaexêêxŭçax na Cristurŭü namaã peporaexŭçax i ngêma ngŭxŭgü nhŭxmatata pexçax ínangu.

**Name nixŭ na ipuracüexŭ
i wüxichigü**

⁶Pa Chaueneëgŭx, tórü Cori ja Ngechuchu ja Cristuégagu pexŭ tamu na tama namaã pexãmücügŭxŭçax i tacü i taeneë i tama puracüchaŭxŭ rü tama ngêma pexŭ tangüexêêácüma maxŭxŭ. ⁷Erü pema rü marü nüxŭ pecuax na nhuxãcü tá pemaxêxŭ na toxrŭü penaxŭxŭçax. Jerü toma ga jexguma petanüwa tajexmagügu rü torü ñnaxçax tapuracüe, rü tama jexma tarüchomare. ⁸Rü toma rü taguma texéarü ñna ngetanüácüma tangõx. Notürü ngunecü rü chütacü rü torü ñnaxçax tapuracüe na tama wüxi ga guxchaxŭ pexŭ tixŭgŭxŭçax. ⁹Rü woochirex Tupanapexewa rü name nixŭ ga perü ngŭxêêçax na ítaxaxŭ, notürü tama jemaãcü tanaxŭ. Rü torü ñnaxçax tapuracüe jerü pexŭ nüxŭ tadauxêêchaŭ na nhuxãcü meã imaxŭxŭ. ¹⁰Jerü jexguma petanüwa tajexmagügu, rü

pemaã nüxŭ tixu rü jíxema tama puracüchaŭxê, rü noxtacüma ngexrúma nixŭ na tachibŭxŭ. ¹¹Rü pexçax tanaxŭmatü i ngêmachiga, erü marü nüxŭ taxŭnŭe na petanüwa nangêxmaxŭ i nhuxre i duŭxŭgü i oexŭ rü tama puracüechaŭxŭ rü toguechigagumare rŭxŭnŭexŭ. ¹²Rü tórü Cori ja Ngechuchu ja Cristuégagu tanamu na meãmare ínapuracüexŭçax i ngêma duŭxŭgü na nŭmatama norü ñnaxçax nataxegŭxŭçax. ¹³Pa Chaueneëgŭx, itama nüxŭ perüchax na mexŭ pexŭexŭ! ¹⁴Rü ngêxguma texé tama naga ínŭgu i nhaã ore i poperawa pemaã nüxŭ tixuxŭ ;rü marü tüxŭ pecuax na texé tŭxŭ! Rü tama name i tŭmamaã pexãmücü na taxãnexŭçax i tŭmax. ¹⁵Notürü tãxŭtáma namaã perüxuwani! Rü name nixŭ i nhama peeneëxŭ pexucŭxêxŭãcüma meã tüxŭ pexucŭxêmare.

**Pauru rü naxçax ínaca na Cori ja
Ngechuchu nüxŭ rŭngŭxêêxŭ ga
jema jaxögŭxŭ**

¹⁶Rü chanaxwaxe i nŭmatama ja tórü Cori ja tüxŭ meãxêêcü pexŭ narüngŭxêê na guxŭguma i guxŭwama pemeãmareechaxŭçax. Rü chanaxwaxe na nüma rü petanüwa na nangêxmaxŭ i guxãma i pemax. ¹⁷Chama i Pauru rü çaxmexmaãtama pexçax chanaxŭmatü i nhaã chorü moxê. Rü ngêmaãcü nixŭ i chaugŭ nagu chawüégaxŭ i guxŭma i chorü popera. Rü ngêmaãcü nixŭ i chanaxŭmatŭxŭ. ¹⁸Rü chanaxwaxe i tórü Cori ja Ngechuchu ja Cristu poraãcü pexŭ narüngŭxêê i guxãma i pemax.

*Rü nuãma pexna,
Pauru*